

摘藻堂四庫全書薈要

集部

欽定四庫全書薈要卷一萬七千二百九十二集部

御定歷代賦彙卷七十三

宮殿

德陽殿賦

漢李尤

開三階而參會錯金銀於兩楹入青陽而窺總章歷戶
牖之所經連壁組之潤漫雜蚪文之蜿蜒爾迺周閣迴
匝峻樓臨門朱閣巖巖嵯峨累雲青瑣禁門廊廡翼翼
華蟲詭異密采珍縟達蘭林以西通中方池而特立果

竹鬱茂以蓁蓁鴻鴈沛裔而來集德陽之北斯曰濯龍
葡萄安石蔓延蒙龍橘柚含桃甘果成叢文槐曜水光
映煌煌

魯靈光殿賦

有序

漢王延壽

魯靈光殿者蓋景帝程姬之子恭王餘之所立也初恭
王始都下國好治宮室遂因魯僖基兆而營焉遭漢中
微盜賊奔突自西京未央建章之殿皆見隳壞而靈光
歸然獨存意者豈非神明依憑支持以保漢室者也然

其規矩制度上應星宿亦所以永安也予客自南鄙觀
藝於魯覩斯而貽曰嗟乎詩人之興感物而作故奚斯
頌僖歌其路寢而功績存乎辭德音昭乎聲物以賦顯
事以頌宣匪賦匪頌將何述焉遂作賦曰

粵若稽古帝漢祖宗濬哲欽明殷五代之純熙紹伊唐
之炎精荷天衢以元亨廓宇宙而作京敷皇極以創業
協神道而太寧於是百姓昭明九族敦序乃命孝孫俾
侯於魯錫介珪以作瑞宅附庸而開宇乃立靈光之祕

殿配紫微而為輔承明堂於少陽昭列顯於奎之分野
瞻彼靈光之為狀也則嵯峨嶰嵬危巍嶮岿吁可畏乎
其駭人也峒堯侗儻豐麗博敞洞轆轤兮其無垠也邈
希世而特出羌瓌譎而鴻紛屹山峙以紆鬱隆崛岉乎
青雲鬱坱圠以增崑崙繒綾而龍鱗汨礧礧以璀璨赫
燁燁而燭坤狀若積石之鏘鏘又似乎帝室之威神崇
墉岡連以嶺屬朱闕巖巖而雙立高門擬於閭闔方二
軌而並入於是乎乃歷夫太階以造其堂俯仰顧盼東

西周章彤彩之飾徒何為乎濔濔汙汙流離爛漫皓壁
皓曜以月照丹柱歛艷而電烜霞駁雲蔚若陰若陽濯
濯燐亂煒煒煌煌隱陰夏以中處靈寥寂以崢嶸鴻煥
煇以燦閭颺蕭條而清泠動滴瀝以成響殷雷應其若
驚耳嘈嘈以失聽目矍矍而喪精駢密石與琅玕齊玉
璫與璧英遂排金扉而北入霄藹藹而晦曖旋室嫵媚
以窈窕洞房叫窸而幽邃西廂踟躕以閒宴東序重深
而奧秘屹矍矍以勿罔屑厲翳以懿潏魂悚悚其驚斯

心惏惏而發悸於是詳察其棟宇觀其結構規矩應天上憲觜陬倔倨雲起嶽崙離樓三間四表八維九隅萬楹叢倚磊砢相扶浮柱峒巒以星懸漂堯峴而枝柱飛梁偃蹇以虹指揭遽遽而騰湊層檻礧倨以岌峨曲枅要紹而環句芝栢攢羅以戢晉枝掌扞扞而斜據傍天矯以橫出互黝糾而搏負下第蔚以璀璨上崎嶇而重注捷獵鱗集支離分赴縱橫駱驛各有所趣爾乃懸棟結阿天牕綺疏圓淵方井反植荷葉發秀吐榮菡萏披

敷綠房紫葍窰窰垂珠雲綵藻枕龍桷彫鏤飛禽走獸
因木生姿奔虎攫拏以梁倚仡奮豐而軒髻虬龍騰驤
以蜿蟺領若動而躩踞朱鳥舒翼以峙衡騰蛇蟠虬而
遠棖白鹿孑蜺於構櫨蟠螭宛轉而承楣狡兔踈伏於
枌側獫狁攀椽而相追玄熊蚺蚺以斷斷卻負戴而蹲
踈齊首目以瞪盼徒眈眈而狉狉胡人遙集於上楹儼
雅跽而相對仡欺猗以鵬眈顙顙顙而睽睽狀若悲愁
於危處潛顰蹙而含悴神仙岳岳於棟間玉女闥牕而

下視忽瞋眇以響像若鬼神之髣髴圖畫天地品類羣
生雜物竒怪山神海靈寫載其狀託之丹青千變萬化
事各繆形隨色象類曲得其情上紀開闢遂古之初五
龍比翼人皇九頭伏羲鱗身女媧蛇軀鴻荒樸略厥狀
睢盱煥炳可觀黃帝唐虞軒冕以庸衣裳有殊下及三
后淫妃亂主忠臣孝子烈士貞女賢愚成敗靡不載叙
惡以誡世善以示後於是乎連閣承宮馳道周環陽榭
外望高樓飛觀長塗升降軒檻曼延漸臺臨池層曲九

成屹然特立的爾殊形高徑華蓋仰看天庭飛陞揭孽
緣雲上征中坐垂景瀕視流星千門相似萬戶如一巖
穴洞出逶迤詰屈周行數里仰不見日何宏麗之靡靡
咨用力之妙勤非夫通神之俊才誰能尅成乎此勲據
坤靈之寶勢承蒼昊之純殷包陰陽之變化含元氣之
烟煴玄醴騰涌於陰溝甘露被宇而下臻朱桂黝儵於
南北蘭芝婀娜於東西祥風翕習以颯灑激芳香而常
芬神靈扶其棟宇歷千載而彌堅永安寧以祉福長與

大漢而久存實至尊之所御保延壽而宜子孫苟可貴
其若斯孰亦有云而不珍亂曰彤彤靈宮歸罪穹崇紛
厖鴻兮崩崩崑崙岑崑崙疑駢龍窈兮連拳偃蹇崑崙
蹇蹇傍敬傾兮歇欵幽靄雲覆靈靄洞杳冥兮葱翠紫
蔚礪礪瓌璋含光晷兮窮奇極妙棟宇已來未之有兮
神之營之瑞我漢室永不朽兮

景福殿賦

魏何晏

大哉惟魏世有哲聖武創元基文集大命皆體天作制

順時立政至於帝皇遂重熙而累盛遠則襲陰陽之自然近則本人物之至情上則崇稽古之弘道下則闡長世之善經庶事既康天秩孔明故載祀二三而國富刑清歲三月東巡狩至於許昌望祠山川考時度方存問高年率民耕桑越六月既望林鍾紀律大火昏正桑梓繁蕪大雨時行三事九司宏儒碩生相與感乎溽暑之伊鬱而慮性命之所平惟岷越之不靜寤征行之未寧乃昌言曰昔在蕭公暨於孫卿皆先識博覽明允篤誠

莫不以為不壯不麗不足以一民而重威靈不飾不美
不足以訓後而示厥成故當時享其功利後世賴其英
聲且許昌者乃大運之攸戾圖讖之所旌苟德義其如
斯夫何宮室之勿營帝曰俞哉玄輅既駕輕裘斯御乃
命有司禮儀是具審量日力詳度費務鳩經始之黎民
輯農功之暇豫因東師之獻捷就海孽之賄賂立景福
之祕殿備皇居之制度爾乃豐層覆之耽耽建高基之
堂堂羅疏柱之汨越肅坻鄂之鏘鏘飛欄翼以軒翥反

宇轍以高驤流羽毛之葳蕤垂環玼之琳琅參旗九旒
從風飄揚皓皓盱盱丹彩煌煌故其華表則鎬鎬鑠鑠
赫奕章灼若日月之麗天也其奧祕則翳蔽曖昧髣髴
退檠若幽星之纚連也既櫛比而攢集又宏璉以豐敞
兼包博落不常一象遠而望之若摛朱霞而耀天文迫
而察之若仰崇山而戴垂雲嗟瓌瑋以壯麗紛彳彳其
難分此其大較也若乃高覺崔嵬飛宇承霓繚繚黠
隨雲融泄鳥企山峙若翔若滯峨峨葉葉罔識所屆雖

離朱之至精猶眩曜而不能昭晰也爾乃開南端之豁

達張筍虛之輪囷華鐘杙其高懸悍獸仡以儷陳體洪

剛之猛毅聲訇殿其若震爰有遐狄鐐質輪茵坐高門

之側堂彰聖主之威神芸若充庭槐楓被宸綴以萬年

綵以紫榛或以嘉名取寵或以美材見珍結實商秋敷

華青春藹藹萋萋馥馥芬芬爾其結構則修梁彩制下

褰上竒桁梧複疊勢合形離艷如宛虹赫如奔螭南岨

陽榮北極幽崖任重道遠厥庸孔多於是列髹彤之繡

桷垂琬琰之文璫螭若神龍之登降灼若明月之流光
爰有禁楸勒分翼張承以陽馬接以圓方斑間賦白疎
密有章飛抑鳥踊雙轅是荷赴險凌虛獵捷相加皎皎
白間離離列錢晨光內照流景外燁烈若鉤星在漢渙
若雲梁承天駟徙增錯轉縣成郭茹密倒植吐被芙蕖
繚以藻井編以絳疏紅葩艷鞞丹綺離婁菡萏翕纖
縵紛敷繁飾累巧不可勝書於是蘭栢積重窳數矩設
櫺櫺各落以相承欒栢天矯而交結金楹齊列玉舄承

跋青瑣銀鋪是為閨闈雙枚既修重桴乃飾槐栢緣邊
周流四極侯衛之班藩服之職溫房承其東序涼室處
其西偏開建陽則朱炎豔啓金光則清風臻故冬不淒
寒夏無炎燁鈞調中適可以永年墉垣碣基其光昭昭
周制白盛今也維縹落帶金釭此焉二等明珠翠羽往
往而在欽先王之允塞悅重華之無為命共工使作績
明五采之彰施圖象古昔以當箴規椒房之列是準是
儀觀虞姬之容止知治國之佞臣見姜后之解珮寤前

世之所遵賢鍾離之讜言懿楚樊之退身嘉班妾之辭
輦偉孟母之擇鄰故將廣智必先多聞多聞多雜多雜
眩真不眩焉在在乎擇人故將立德必先近仁欲此禮
之不訾是以盡乎行道之先民朝觀夕覽何與書紳若
乃階除連延蕭曼雲征櫺檻丕張鈎錯矩成楯類騰蛇
楣似瓊英如螭之蟠如虬之停玄軒交登光藻昭明騶
虞承獻素質仁形彰天瑞之休顯昭遠戎之來庭陰堂
承北方軒九户右个清宴西東其宇連以永寧安昌臨

圃遂及百子後宮攸處處之斯何窈窕淑女思齊徽音
聿求多祜其祜伊何宜爾子孫克明克哲克聰克敏永
錫難老兆民賴止於南則有承光前殿賦政之宮納賢
用能詢道求中疆理宇宙甄陶國風雲行雨施品物咸
融其西則有左城右平講肄之場二六對陳殿翼相當
僻脫承便蓋象戎兵察解言歸譬諸政刑將以行令豈
惟娛情鎮以崇臺實曰永始複閣重闌猖狂是俟京庾
之儲無物不有不虞之戒於是焉取爾乃建凌雲之層

盤浚虞淵之靈沼清露瀼瀼淥水浩浩樹以嘉木植以
芳草悠悠玄魚睭睭白鳥沈浮翱翔樂我皇道若乃虬
龍灌注溝洫交流陸設殿館水方輕舟篁棲鷗鷺瀨戲
鰕鮒豐侔淮海富賑山丘叢集委積焉可殫籌雖咸池
之壯觀夫何足以比讎於是揭以高昌崇觀表以建城
峻廬岌岌岑立崔嵬巒居飛閣干雲浮階乘虛遙目九
野逡覽長圖俯看三市孰有孰無覩農人之耘耔亮稼
穡之艱難惟饗年之豐寡思無逸之所歎感物衆而思

深因居高而慮危惟天德之不易懼世俗之難知觀器
械之良窳察俗化之誠偽瞻貴賤之所在悟政刑之夷
陂亦所以省風助教豈惟盤樂而崇侈靡屯方列署三
十有二星居宿陳綺錯鱗比辛壬癸甲為之名秩房室
齊均堂庭如一出此入彼欲反忘術惟工匠之多端固
萬變之不窮物無難而不知乃與造化乎比隆讎天地
以開基並列宿而作制制無細而不協於規景作無微
而不達於水臬故其增構如積植木如林區連域絕葉

比枝分離背別趣駢填胥附縱橫踰延各有攸注公輸
荒其規矩匠石不知其所斲既窮巧於規摹何彩章之
未殫爾乃文以朱綠飾以碧丹點以銀黃爍以琅玕光
明熠燿文彩璘班清風萃而成響朝日曜而增鮮雖崑
崙之靈宮將何以乎侈旃規矩既應乎天地舉措又順
乎四時是以六合元亨九有雍熙家懷克讓之風人詠
康哉之詩莫不優游以自得故淡泊而無所思歷列辟
而論功無今日之至治彼吳蜀之湮滅固可翹足而待

之然而聖上猶孜孜靡忒求天下之所以自悟招忠正之士開公直之路想周公之昔戒慕咎繇之典謨除無用之官省生事之故絕流遁之繁禮反人情於太素故能翔岐陽之鳴鳳納虞氏之白環蒼龍覲於陂塘龜書出於河源醴泉涌於池圃靈芝生於丘園總神靈之貺祐集華夏之至歡方四三皇而六五帝曾何周夏之足言

景福殿賦

魏
韋
誕

瞻大夏之穹崇結增構而高驤修棟迫以虹指飛甍竦
而鳳翔棖桷駢逼以星羅軒檻曼延而悠長伏應龍於
反宇乘流蘇以飄揚於是周覽升降流目評觀叢楹負
極飛檻承欒析梧綺錯淙枕鱗攢芙蓉倒植藻井懸川
望舒涼室羲和溫房玄冬則暖炎夏則涼總寒暑於區
宇制天地之陰陽又有外城金狄詭貌殊姿列於應門
肅有容威若乃離殿別館燦如列星安昌延休清宴永
寧美百號之特居嘉休祥之令名步雕輦以逍遙時容

與於蘭庭又有教坊講肆才士布列新詩變聲曲調殊
別吟清商之激哇發角徵與白雪音感靈以動物超世
俗以獨絕然後御龍舟翳翠蓋吳姬櫂歌越女鼓枻詠
采菱之清謳奏淶水之繁會

景福殿賦

魏
夏侯惠

周步堂寓東西眷眄綵色光明燦爛流延素壁皜養赫
奕清練爾乃察其竒巧觀其微形欽崙紆曲盤牙敬傾
或天矯而雲起或詰屈而環縈衆木附枝以連注欒梧

倚亞而相經若乃仰觀綺牕周覽芰荷流采的皪微秀
發華纖莖葳蕤順風揚波含光內耀婀娜紛葩曾櫨外
周榱桷內附或因勢以連接或邪詭以盤構於是乎飛
閣連延馳道四周高樓承雲列觀若浮挹朝露之華精
漱醴泉之清流

華林清暑殿賦

宋孝武帝

若夫瑤榭未清瓊室流炎薰風夕烈熾景晨嚴高巒廢
駕遊衢輟驂思延寒於夏堂豈徒聞於遺籍伊涼燠之

可變粵在今之猶昔密盼林梁側眺池籩起北阜而置
懸湖沿西原而殿清暑編茅樹基採椽成寓轉流環堂
浮清浹室闢西櫺而鑒斜月高東軒而望初日粵乃炎
精待戒青祇將畢濯禊在辰風光明密婉祥鱗於石沼
儀瑞羽於林術浮觴無屈展樂有時惟歡洽矣含歌受
辭歌曰山懷風兮谷吐泉清潭邃兮遠氣宣符深情兮
應遙心促千里兮測雲天

華林清暑殿賦

宋 何尚之

逞繇亘之虹梁列雕刻之華棖網戶翠錢青軒丹墀若
乃奧室曲房深沈冥密始如易循終然難悉動微物而
風生踐椒塗而芳溢觸遇成宴暫遊累日却倚危石前
臨濬谷終始蕭森激清引濁涌泉灌於階砌遠風生於
楹曲暑雖殷而不炎氣方清而含育哀鵲唳暮悲猿啼
曉靈芝被崖仙華覆沼

華林清暑殿賦

宋 劉義恭

構禦暑之清宮傍測景之西岑列喬梧以蔽日樹長楊

以結陰醴泉湧於椒室迅波經於蘭庭叢芳芝以爭馥
合百草以競馨飾丹壤以和璧加疏楹以連城至於朱
明在運鬱夕囂晨寒堂涼結清觀風臻覽茲寓之靈緯
啓聖情以寤神豈宣曲之妄擬焉甘泉之足陳

殿賦

梁蕭統

觀華曜之美者莫若高殿之麗也高殿博敞華色照朗
內備雜藻外發珍象延眴觀之欣然俯仰闌檻參差棟
宇齊夏玄黃既具鮮麗亦發椽并散節若山若谷或象

翔鳥或擬森竹藻枕鮮華而粲色山節珍形而曜目旅
視刑則委累嵯峨雕丹文於簷際鏤華形以列羅若乃
日照珠簾彪炳灼爍輕風吹幌乍揚乍薄接長棟之耿
耿簷垂溜於四隅建廂廊於左右造金墀於前廡卷高
帷於玉楹且散志於琴書

含元殿賦

有序

唐李華

宮殿之賦論者以靈光為宗然諸侯之遺事益務恢張
飛動而已自茲已降代有詞傑播於聲頌而無聞焉夫

先王建都營室必相地形詢卜筮考以農隙工以子來
虞人獻山林之榦太史占日月之吉雖班張左思角立
前代未能備也而曩之文士賦長笛洞簫懷握之細則
廣言山川之阻采伐之勤至於都邑宮室宏模廓度則
略而不云其體病矣至若陰陽慘舒之變宜於壯麗棟
宇繩墨之間鄰於政教豈前修不逮將俟聖德而啓臣
心輒極思慮作含元殿賦陋百王之制度出羣子之曾
臆非敢厚自夸耀以希名譽欲使後之觀者知聖代有

頌德之臣焉其辭曰

維皇高祖穆端命於玄穹萬有千載鍾景祚於鴻裔建
北宮之尊嚴上取法於天帝乃圖正殿之適居規崇山
而定制信神明幽贊而人謀襲契不然何前王曠此之
雄麗也先是大司空帥其屬執度而相之曰美哉川原
驚乎其大哉亘坤靈兮配乾剛坤順乾而為龍舒廣衍
兮走羣山紛却面而朝宗陵正陽之奕奕鬱佳氣之葱
葱蓋昊天之作而皇祇授元聖獲以造新宮也乃審於

龜筮龜筮叶從太卜以告神人咸同皇曰欽哉是將宜
於朕躬因以鴻稱含元建名易乾坤之說曰含弘光大
又曰元亨利貞括萬象以為尊特巍巍乎上京則命徵
般石之匠下荆揚之材操斧執斤者萬人涉磧礫而登
崔嵬擇一榦於千木規大壯於喬枚聲坎坎於青雲若
神踣而顛摧勢動連崖拉風碎雷倒勁梢於窮谷斬巨
祗於昭回時也山祗效靈波神作氣為桴為棹羽疊鱗
萃朝沈江漢夕出河渭雲奔山橫交積於作宮之地於

是農事既收靈臺勿亟子來而就役者周邦畿而薄四海咸忘勞而獻力乃張為廣度考正極星邦伯是經國工研精刻盤岡以為址太階積而三重因博厚而順高明築陵天之四墉四墉既列太階如截下上相嶽愕視沈沈其始也星鉞電交於萬堵霜鋸冰解於千尋擁材為山攢杵如林乃占日月之吉以成帝室雄梁勁於中楹榱桷戢以龍密析姑繇以為楹隳喬山以為礪飛重檐以切霞炯素壁以留日神標峻摘鬼疊層楣高卑迭

作尋尺相持木從繩而後正棟操宇而不危陞瑩冰級
瓦敷鱗差蕩晶景而升降歛暘以交輝聳大廈之奇
傑勢將頓而復飛爰詔有司練日推時徵考室於周詩
會公卿以落之丕赫哉如俯如跂若會若離森修邃以
宵微况業駢而巖巍謂衝飈激海兮漩淵淪以無底奔
雷觸山兮掉巘𡵚而傾𡵚石鮫拖首於堂廡狀出雲而
撐鬐嵩高之制靈丘上盤鄰斗極之光耀邇天漢之波
瀾察鑿枘之吞吐吸山叢而水攢建升龍之大旆邈不

至於階端崢嶸孱顏下視南山照燭無間七耀迴環歛
欲赫以突兀攄闔弘以蕭緜捧帝座於三辰衝天街於
九達進而仰之騫龍首而張鳳翼退而瞻之岌樹顛而
岑雲末疑今峩峩巨鼇戴仙山而出滄波劃兮煌煌燭
龍拆穹穴而臨北方排層城而廓帝居豁閭闔而面蒼
蒼左翔鸞而右棲鳳翹兩闕而為翼環阿閣以周墀象
龍行之曲直夾雙壺之鴻洞啓重閨之呀絕趨堂塗而
未半望宸居而累息惟上聖之欽明爰聽政而崇德去

雕幾與金玉絀漢京之文飾熾丹腹於峻嶒抗重霄而
競色若乃紫微晨暘彤墀夜明雲薄萬栱風交四榮冬
止其陽則釋裘而燠夏休其輿則捐絺以清旂獵風而
振響葉墜露而成聲懸櫨駢湊疎柱奔列複檻曾綴高
牕景熱駢日翳而果連曜天開而中絕形持神而欲離
足悽步而將跌貯昭訓之崇崇璘光範之揭揭其南則
丹鳳啓塗遐矚荆吳十扇開閉陰陽睚眦容鼎九局方
駕五車示王者之無外不樹屏於清都望仙闕於吳維

建福敞於坤隅偃朱旗而橐玄甲屯仡仡之驍夫其後
則深闈祕殿曼宇疎楹瑞木交陰玄墀砥平鮮風歷廡
凌霞飄英蔭藹武闈增華穆清玉燭內融則嘉盛豐備
太陽臨照而天下文明古有六寢御茲一人今也三朝
繇古是因布大命於宣政澹玄心於紫宸義和弭節於
通乾望舒停景於觀象密勿旒宸臣人是仰左黃閣而
右紫微命伊臯以為長其下則鷩冠魚服良家大族厲
禁非宜金吾領之其前則置兩石以恤刑張三侯以興

武告善之旌登聞之鼓節晷漏於鍾律架危樓之筍簾
以辨內外之差以正東西之序天光流於紫庭倒影入
於朱戶騰祥雲之郁靄映旭日之葱蘢清渠導於元氣
玉樹生於景風夷坦數里徘徊無窮羅千乘與萬騎曾
不得半乎其中厥初經營天下既乂文物未周孤其壯
麗蓋重於施勞非不懷也乃眷睿孫睿孫開元萬物晏
清而太和掩書契之所論既克廣於崇構聲明備而益
尊蓋聖皇之孝也輝焯變化兮動搖乾坤其東於是弘

文教而開館對日華之清閼蓋左學之遺制協前王之
講德其西於是延載筆之良史俯月華之峻扉集賢人
於別殿朝命婦於中闈王風闡而成化陰教備而不虧
加以詠周詩而展親睦魯衛而敦叙因合族而來宴置
更衣之豐宇至於殿內諸曹則左右有局通軒並無物
有恒司供無廢舉又有銀璫珥貂寺人巷伯奉宣出納
之令更踐宮中之役熊羆之旅董以龍武矛戟森森林
官羽林聲破丘山氣驚飛沈爪挾千鈞跟騰百尋克壯

皇威協比其心其外則校人掌馬天駟在閑以備順遊
放牧其間望我鑾和陟彼高山猶慮憲章或遺國容未
備乃立掌廄之司館通事之吏職在達下情於上天儆
王言於有位塏通太極澄指龍池重門內注複道潛移
幽峻肅以相屬光彤融以熳熳懸象著明帝座維三皇
居設位俯察仰參翼室正中游宮次南乃起含元其容
眈眈總而言之如山之壽則曰蓬萊如日之昇則曰大
明自茲而北燕遊所經達於苑囿不可殫名周廬更呵

匝以環衛南端百仞上極霄際却視歎崧經塗廣深繚
以層城黝為重陰至若時雨膏田九農懷暢雲歸山穴
儵以昭曠白日麗於宮隅混晶光而益壯於是風師斂
威纖璫不升穎絕搖芒葉無翻稜自中徂外鏡洗川澄
弦直閭閉井畫溝塍靡迤秦山陂陀漢陵知稼穡之艱
難見皇王之廢興及乎玄冥戒寒海神飛雪瑤城粉野
琪樹森列玉宇璇階雲門露闕天華夾霄朗日朝徹赤
旌降庭朱柱豔月仰白帝而金精開披河宮而銀燭發

其或蠻夷不至帝用興戎降元帥於天上發神謀於禁
中皇靈震耀殄厥渠凶矯矯武臣此焉獻功操俘虜以
陳器械恢莫大之威容爾乃時殷仲冬日正南至上公
奉輦羣后在位一人壽昌萬國承賜式燕以樂欣欣具
醉乃撞宮懸硃碣天地及乎獻歲元辰東風發春懸法
象魏與人惟新儼文物於王庭兼九伐而宿陳威儀之
嚴嶽嶽振振若太一披網緼而俯百神既而咸造勿褻
會朝清明璿柄指寅寢闈發局皇帝御袞龍之法服佩

蒼壁之純精執鎮珪導朱紘降輦登階微聞玉聲於是
典禮之官贊王就位南面穆然至若甸侯采衛要荒閩
貊輸其方賁罔不來格統以千官六卿二伯司儀叙進
象胥僉譯肅肅委皮乾乾奠璧設以庭燎天烘地赫雷
鼓殷殷朱干玉戚神籥如生熊羆曠敵危昂歌向歌爛
飲射金根玉輅太常少伯火列門旂霜交陛戟乃進元
元以觀禮坻億兆之增增金吾南首麾之以肱遞攀援
而聳仰齊屨企而冠騰太史來告卿雲勃興灑豐澤於

生人谷上玄之休徵申命司寇緩刑冢卿降德秩山川
而問耆老周雨露而均邦國華戎竭歡喜氣闡塞揭金
雞於太清炫晨光於正色慶欣之聲不踰辰而霽四域
當斯時也驅周驟漢於廓煥爛王臨於朝天地貞觀靈
宮巖巖上下交贊蓋所以法乾道而遵帝度豈惟安體
而明威者哉夫瑤臺之美不可以刑萬國土階之陋不
可以儀天下奢不遜而儉固允執中於大位洪範曰皇
建其有極富哉上聖之宏議也詩歌楚室頌美泮宮諸

侯之事也雲夢甘泉宴談景福辟王之志也論諸侯曷
若以戴天子嘉辟王曷若以尊聖人烈烈盛唐祖武宗
文五帝赧德六王慙勳而政本乎慈用過乎儉夫蒼生
所奉者惟君所愛者惟親寧有君親宅體於卑室而臣
子得安其身乎故有熊明庭帝姚總期從人欲也天垂
定星易有大壯君人法焉聖朝猶斥其華而憑其質今
為是殿也惟鐵石丹素無加飾焉身居玄眇心與萬姓
同畎畝之勞以是臨衆何衆不賓以是享神何神不若

其天德歟雖欲宮崑崙而館不周城八極而隍四海猶未足儲鴻醇而俯丕耀豈咸鎬一京之所在策四瀆之前歲敕懷鉛之小臣俾讎書於禁中正百代之遺文由是循環天造耳目日新敢頌成功告於神明無媿斯干之什式昭聖德之容頌曰帝作含元含元言言萃若日觀呀為天門太階三層遠法崑崙崙崙鎮茲秦野揭以周原烈文祖宗永錫孝孫孝孫有慶於以施令奄甸萬姓受天休命歌之頌之管磬宜之穆穆皇君壽考無期既成

斯文客有勸之上者對曰前王之宏祥詭瑞乃聖朝之
細事今休徵已厭於聰明頌聲亦飫於天意夫私歌竊
抃乃臣子之常志又焉足以薦聞哉客曰不然今至尊
明發不寐永懷先皇周文之孝也允恭克讓光溢海內
堯帝之謙也自即位已來上下之休嘉臣人之詠歌歌
於睿躬則固辭頌於宗廟則無數今吾子之文昭乎累
聖之耿光美於大君之孝德可進而退宜言而默使雅
頌之音卷而不舒猶坦蕩其曾臆無乃過歟為人之下

者有可達乎君親雖濱於死亦冒行之况宗廟或啓其
心乎臣華嘗聞遷善之規願附升歌之末

明光殿粉壁賦

以上春早朝伏
奏青蒲為韻

唐樊

鑄

粉潔白兮壁宏壯白者取潤色於明光壯者取雄居於
君上成巧人之手澤起漢皇之心匠凝雪彩耀冰狀宸
旒居際謂分照於此日之君冠劔朝時欲和光於為鹽
之相茲殿攸起不無所因寧在於白亦以象真守靜含
虛上以鄰貞明於千年之主保純不汚下以範恬淡於

萬國之臣煥北極而開瓊室激南風而生玉塵月桂低
檐失蟾暉於午夜御柳垂砌惹絮色於三春則知粉壁
之道齊乎玄造達上下而明明通晝夜之杲杲日昃之
後慰天勤而暝遲夙興之時副聖恩而曙早信可大而
可久實永堅而永好懿夫榮雖原本闕一字畫飾不至驕挺
棄炭以莫變洞閒華而自昭可使楚客具瞻羞持練而
稱獻荆人仰止恥懷寶而來朝豈止光動玉戶氣射金
屋秋露懷慙冬霜自伏蛾眉夜侍意瑤臺之已升玉顏

曉臨若瑞雲之相逐而已哉觀夫匱匣皎晶迴環廣袤
濃潤交翕浮華相透處高莫蔽通四目之敷求含明必
竟受百官之草奏雖奢儉不失精研克構終未可小桂
椒為糠粃汰茅茨為阨陋然為用因有貴飾形居安撫
極抱素常寧色不喪真久已生於虛白白能受采冀一
及於丹青噫漢皇立則未足為模我聖作範實謂殊塗
象為璧兮則搜材於豫章之器代其粉也則聚賢於堅
白之徒以張皇二儀為光明之殿以照耀四海為粉壁

之隅故錯薪從楚安輪以蒲是得趨於金馬希便維於白駒

鴻慶宮三聖殿賦

有序

宋 劉 攽

臣伏見陛下追述祖考崇奉明祀新作三聖殿以昭孝明功於天下臣以文學中第太常試官祕書目覩盛事不敢以鄙薄自絀輒作古賦一篇歌詠盛德昔靈光景福之作世稱其美麗然其所謂壯大不出乎雕刻畫繪文彩之煌煌而已又盛道工人之巧民力之衆材木之

多金玉之偉臣以謂聖王有作則必智者獻其巧壯者輸其力山林不敢愛其材府庫之聚皆所供億也是物理之常不足以夸大臣愚竊陋之若夫天命廢興之際聖王授受之符非敏智通達未有能究知其始終者固難為寡見淺聞者道也臣竊大之是以略所陋而張所大不敢仰希風人雅頌之列庶幾有其志云爾

蓋上帝之所選建明聖命以天位者乃所以享德而報功未有德盛於前功播於後而其子孫寂寥千載無聲

者也賢哲所談六籍之云德莫著於有虞功莫隆於五
臣禹平水土夏姒以家司徒后稷是教是食肇商興周
歷載累百皐陶大理五刑以明於其苗裔乃興於唐若
夫董鵜耀以攸司奏庶民之鮮食焚山烈澤害服妖息
鳥獸咸若草木允殖固伯益之力焉天報以位俾秦繼
周於其子孫誣祖不紹去火即水叛禮尚刑法以慘急
然猶兼六國一天下而不知變於初二世以斃非天不
相朕虞之後乃其否德得罪於祖而斷棄也惟伯益之

功未報是以天命復集於趙氏焉五代喪德九土分裂
海水橫流民用墊溺鳥獸昌熾黔首失職滔滔惑惑蓋
若洪流之未闢於是太祖乘火而帝繼益之功天胙吉
土曰惟商丘是為星火大辰之居亦曰明堂布政之由
出潛離隱或躍在淵以有九有百度正焉削禍戡亂出
民塗炭風指日舒天地正觀荆燕吳蜀楚越并冀懾威
懷仁奔走失氣倔强者執服柔從者加賜太宗承之真
宗成之登封降禪矢直砥平巍巍乎邈三五而儔儷彼

漢魏之瑣瑣曾何比京夫伯益始掌火而底績而宋以
火帝興於火墟天之報施豈不昭昭可推而類也哉且
夫積功以凝命而創業因物以胙土由土以建號樂以
反初禮不忘其本是故作於原廟建之別都三聖鼎列
大廈以居以答景貺以昭成功俾子孫知厥所由億兆
仰德而不窮也厥後烈風雲雨電雷震曜敬戒於下濫
炎流燒天子怵於大異反已正德伏念七年乃其有得
曰天以德訓予而以威震予依類託喻予敢不信夫政

不變不足以化新禮不修不足以化民天之示人若曰
政禮之敝雖祖宗之為猶當勿憚乎改更於是詔三事
飭九卿和布於舊載損載益以答天誠以舉聖職夫既
天行而日白矣乃復闕宮獎夫神衷三后在天對越上
穹經之營之不日成之闕偉竒麗宮寢之勿踰也清閒
宥密鬼神之所都也絜百圍而置楹兮度千仞以架棟
擇一木於萬章兮顧餘羨者猶衆般倭獫人之儔獻巧
而林立兮莫不心競而賁用亘長廊其如城兮闕重門

其似洞欒棋粲其如星兮侏儒屹其承重如輦斯飛如
鳥斯革兮誠可慄其將動闔陰房之密靜兮雖六月其
必寒闔陽榮之敞麗兮蓋中夜而已旦陟廣除而徑上
兮每百尺而一級歷青珉之瑩滑兮曾不得而側立顧
風雨之在下兮足以避夫燥濕良非人力之所為兮宜
鬼神之攸集於是使夫設色之工後素之巧想像形容
圖寫必效夫其龍顏日角天質之顒印兮臣乃今知真
人之異表於是駕鑾輅登玉虯千乘萬騎雲動而景附

兮想生平之豫游旂常繽紛以艷翕兮鐘鼓軒轟簫管
發而啁啾雜魚龍之奇技兮蜿蜒曼延於道周百神紛
而並迎兮出閭闔而御夫龍舟爾乃川后靜波屏翳息
風舳艫相銜若複道之延屬兮亘千里而相通百工備
官而夙設兮櫂夫謹呼而奏功惟吉行之五十兮餘日
力而靡窮既屆既止威儀若初以幸夫壽宮乃即前楹
以修祀事威神如在望之可畏殫金玉以備用罄飛潛
以薦味惟帳筦簟之安肆几杖筆研之儲侍靡一物之

蓋闕兮所以廣孝思而盡心志守臣侍祠罔不肅飾既
事而旋閱而莫覲列仙之儒偃佺之倫迎神頌祇於其
側若夫祝融重黎相土閔伯固已喜動乎魄情見乎色
護清蹕而晞盛德也巍巍大哉不可得而記已且夫天
命之不忘人主之大寶也祖宗之有繼子孫之勿替也
茲聖王所以繼統垂業超商邁周卹嗣錫羨貽厥孫謀
使萬有千歲得以希風而承流也遂作頌曰崇崇商丘
大火主兮曰宋之興道是配兮建邦設都以有九土兮

有皇上帝明德輔兮伯益之功邈不可忘兮三聖承承
有烈光兮奕奕寢廟神翱翔兮于胥萬年尚無疆兮

慈寧殿賦有序

宋王仲言

臣聞乾天稱父坤地稱母天地至大必言之以父母者
明其尊崇博厚無以加也是以圓首方足皆仰之燾之
欲報欲奉無不極盡繇古以來聖人之盛莫過堯舜而
孟子以為堯舜之道孝悌而已矣恭惟皇帝陛下繼大
人之照宜日中之豐體堯邁舜憲古明王以治天下發

為號令典誥廟謨宸斷親仁善鄰開物成務者莫不以
孝為首臣聞孔子謂曾參曰明王以孝治天下故災害
不生禍亂不作仰惟陛下曩者以皇太后扈從未還願
見之心致軫宵旰四方兆民延頸指日以冀來音久矣
斯馬天人交孚鄰邦修睦橐弓箠矢息師偃革寰宇之
間遂臻安堵恭奉輿駕言歸闕庭凡在動植孰不手舞
足蹈翼鼓膺奮遙觀古初復無前此臣伏以老氏三寶
以慈為首乾元之道萬國咸寧洪惟慈寧之殿合為嘉

名超軼前世致安之道繇是以始形勢制作煥乎其有
文章儀刑萬邦風化際薄無所不及若堯之光被四表
舜之不冒海隅蒼生者行見於今日甚盛烈也臣生長
當世薰陶漸摩德義之久目覩心欣不能自己思欲頌
良圖協恭式化成規誠開金石感動遠邇以彰聖治莫
大之慶而昭述巨美者有日矣輒因殿之名以推原萬
一至於辭意淺陋言語膚率不能抉竒摘異以為偉不
惟不能亦有所不敢也臣謹昧死再拜而作賦焉

臣恭惟皇帝之嗣位十六載也海宇澄清四方底平受
上天之眷命紹洪基於大明邇安遠至措刑寢兵人熙
熙兮春臺物蕩蕩兮由庚六服承德衆心成城所以復
炎德之輝而迓周邦之衡先是駟駕從狩鄰國克享天
心咸有一德式遄來歸懽動九域乃命羣工擇基之隆
儲祥之勝圻建問安之上宮列辟肅然而赴職百執踴
然而效忠爰即行闕以成厥功於是上高擬天下蟠法
地削甘泉之繁縟屏含元之侈麗揆太極之宸模就坤

靈之寶勢乃諏龜筮龜筮協從乃稽萬物萬物無異帝
曰欽哉乃彰鴻名慈以覆育於天下寧以鎮服於寰瀛
蓋將昭徽音於太姒而表思齊於周京者也有嚴有憑
或降或昇揆之以日筮之登登經始勿亟百堵皆興伎
者獻其技能者精其能否往兮泰來闡決兮垠開蒼昊
馳耀兮黃祇助培運郢石之斤斧攻杞梓之良材萬杵
散雨兮千鏡轉雷離婁督繩兮公輸削墨夏育治礫兮
孟賁掇茲聲隆隆兮伐喬枚勢輶輶兮豁層崖長林巨

植兮千年之產而萬年之材輾如闢直如矗今崔嵬於
時山壤獻靈川流效祉陸架水浮風屯雲委輻湊鱗集
衡行櫛比以萃於殿之址也於是匠氏經營百藝駢并
礪焉而礪斲焉而斲高下曲折塗墍丹青此興造之本
意而動作之形容也既而四周凌天而岌業九門參空
而伶俜闕百常兮屋十尋皆捷爵兮建瓴儼儼千栴閑
閑旅楹岫綺對砌牕霞翼櫺彤墀洋洋金碧煌煌神鵠
展吻而咤呀文犀壓牖而赫張寶琲象拱列星間梁櫨

桷欒窳黼藻鉛黃玫瑰玳瑁翡翠明璫方疏圓井瑣連
斗扛枿榱上承柱石下當騰雙猊兮盤礎刻怒兕兮伏
相其蟠也顏九淵之虬屈其翥也若干仞之鳳翔或倒
文漆於衛社或薦孤桐於嶧陽烏枿橫截紺蘖交相第
栲栳與椅榎積榱枿兮豫章蓋天下之奇幹盡羽檠而
國榱夫然未足以比其制未足以形其雄軫輶龍從飛
雲架空出入兮日月吸呼兮雨風開重軒兮繫玉鱗萬
瓦兮游龍高下髮直左右翼從西八東九金礫珉鎔平

寫三山之景坐移羣玉之峰喜洩洩兮樂融融入如遇
兮出如逢映斗杓而瞳矐挹天漢兮春容觀其巨鎮在
南長江在東前擁後顧盤錯窪隆占皇圖之奕奕鬱佳
氣之葱葱天海相際造化溟濛雕題貫脅大牕舂朦尋
橦戴斗兮航浮索援皆馳驅而致恭采肅慎之楛矢職
夷黔之布賓上則天目於潛之山鳳凰南北之巔巉巖
巖薛窈窕回旋狀羣羽之集麓若萬馬之奔川海門之
潮滄溟之淵濠洶奔放勢如朝馬皆足以小嶠函而吞

涇渭等河雒而隘隴岍夫以此而駐蹕實一制而萬全
然而不以為離宮不以為別宇而獨以奉長樂之安而
為承顏之所故能遠邁漢唐跨歷三五則雖兼天下之
奉極天下之貴亦人所樂而天所與也凡臣所鋪翼而
陳之者尚可名言之也非此三吳之盛麗九旂之容衛
六宮之深嚴萬物之侈冶不足以隆一人之孝於無窮
於是俯而拜仰而重曰當乎法駕言歸宗祏生輝千仗
萬騎如指如麾備一時之盛禮慶萬國之洪禧望閭闔

兮瑞霏微剗觚稜兮祥歲挺馭嚴嚴之玉輦建獵獵之
朱旗華蓋效杠天驥驂駢增日星之光明闡老幼之提
攜千官之班兮駕鷺兆民之欣兮嬰慕喜懽動於堪輿
澤周流於道路樂極者或至於抃躍感深者爭先於馳
騫沈湮晏然兮屏翳收風靄韞不興兮豐隆霽怒雙闕
敞兮如升萬室昂兮如沂若乃萬壽誕日之辰一人會
朝之際濟濟峨峨羣臣在位皆輔車而弼夔過房杜兮
丙魏奉玉卮兮瓊覽展采儀兮文陛皇帝躬蹈事親之

美以獨高於萬世進退禮樂抑崇下貴隆帝業兮億載
歡祝聖人兮千萬歲然後敷茲睿化徧於中下尊卑模
範兮盈里閭膏澤滲漉兮盛王霸工在衛士在朝而農
在野百度修明萬幾閒暇無有遐遺睦如姻婭四海安
若覆盂九有基如太華於是有客相謂曰子聞今日之
盛事歟曰然嘻為堯舜神人以和運紹五帝獄訟謳歌
但無為而已矣於致養以云何豈若我皇躬勤儉之資
恢隆平之時約已以奉太母之訓致美以化羣黎之為

端一心而應感斥衆異之盱眙煥爛方冊照溢詩書哉
且容聞歷代之制乎土階之卑不免乎儉固雕椽之飾
不免乎驕奢魯夸靈光而但述土木之巧魏稱景福而
徒為制作之華俱游觀之是云奚文辭之足誇又豈若
我皇綏定邦家以成孝道允紹義媯哉且上棟下宇聖
人所取也至德要道聖人之孝也作於楚室能修泮宮
諸侯之功也與其論諸侯曷若言聖道與其言雄壯曷
若言聖德明明我宋得天下之統烝哉祖宗膺器之重

殆二百年休聲無壅下之所奉者惟君上之所承者惟親當君享九重之實而親安萬乘之尊蓋匹夫之孝曾閔所難不足以言惟據域中之大饗天下之養然後為重也已析而合既失而得然後為喜之至也曠古所無一旦在已漢唐所恨自我而得凡是數者兼而有之不特為四方之賀又將為萬世之光寵也今是殿也不奢不陋不高不卑合禮之界與天下齊以是為固鞏於鼎龜以是為寶保若山谿雖廣八荒而為城開溟渤而為

池倚圓天而為蓋立棟梁於四維亦奚有宜乎於是再
拜而歌曰蒼蒼高旻覆下民兮與物為春澤無垠兮一
人孝至通帝意兮金石可開不可移兮上下合契定太
議兮法駕大駟言還歸兮勅以慈寧為殿名兮厥功告
成百室盈兮居之克安若石磐兮四方瞻觀化益寬兮
天人合應助其證兮光啓中興祖武繩兮紹復大運法
堯舜兮旋澤曲軫翕然順兮孝道克全鑒上天兮壽祿
萬年其永延兮聖人孝兮感人深責成賢輔兮雋功克

忱廣殿軒軒兮巨厦深沈晨昏之養兮萬乘親臨財豐
物阜兮寫於薰琴百姓克愛兮諸侯克欽亘萬國兮得
其歡心宮殿之制已陳之矣天子之孝既備述矣四方
之心見於斯矣口軟字碎其言卑矣欲昭聖孝永無極
矣日月為宇天為卑矣

皇極殿賦

有序

明 徐顯卿

粵若太祖高皇受命作京營金陵而定鼎殿曰奉天迨
成祖文皇北建行宮仍揭前額厥後因以定都歷七聖

而未之或改稽古唐虞繼治總章合宮各殊名號漢世
東西兩都宮殿不相沿襲迄我世宗肅皇之季始承天
意而鼎新之榜正殿曰皇極標建極中極以更謹身華
蓋而左右二順則以會極歸極題焉蓋取洪範五居中
宮曰皇極惟皇建極惟臣會歸之義也大哉皇言於斯
為至矣然時方恭默西寓未遑暇臨欽惟我皇踐祚始
於斯殿朝萬國而莅四海焉惟皇天錫我皇以皇極之
統惟皇考貽我皇以皇極之基天人景從後先光裕猗

歟郁哉昔在帝皇創制殿宇臣工必有詩頌以聲歌其
盛周之靈臺尚矣魯之閼宮續焉乃若何晏之賦景福
徒紀魏闕之壯麗適以昭侈靡示無度耳魯恭位居東
藩乃靈光見於王逸所贊述者顧僭擬天子又奚法焉
惟我明皇極之建物采以別威朴素以崇禮赫赫巍巍
平平蕩蕩直軼百皇而獨盛參三極以婉隆者哉迺作
賦曰

惟皇御歷辨方體國重闕明堂創號皇極詎云規燬之

壯麗僉曰名義之周敕磅礴黃壤以孔垓嶮嶮青霄而
矗峙瑤岑碧巘匝乎其周遭象緯龍躔森乎其旁逼夏
天衢之寥廓坦王道之平直其為狀也浩浩汧汧鑠鑠
奕奕雲籠日耀窈不知蒼牙楣額之幾千萬億其稱名
也協箕疇準禹策包維緯之奇文體洪範之奧則萬象
周羅而環繞天樞五位居中而密運乾德儼兮仞兮四
皇六帝而並域况兮忽兮參天兩地而作式吁其盛哉
余亦烏能管窺而蠡測第規模之弘遠博碩詞人之數

演極矣茲將循名討義而商榷陳之以俟咨訪於多識
蓋嘗仰而觀法於天碧落虛浮葱翠空騫斯殿也徽垣
端拱而法象中懸旋轉玉衡宰幹璣璿攝二曜以升沈
齊七政而推遷三十二星屯方而列署二十八宿按度
而分躔闔闔闔以啓扉絡勾陳而張綆茲實昊皇之垂
象於是乎天極立焉俯而察理於地岳嵩崑崙瀚淪
涎斯殿也輿圖輻湊而效法承乾元精耿耿而中貫坤
粹勃勃而漪連奠四維而鎮九壘控六合而扼八埏渾

大塊以宅中表崑崙而居巔上接玉樓層臺之十二下
該赤縣寶界之三千茲實后皇之奠宅於是乎池極立
焉中而考度於人洪荒抱樸渾沌含玄泰駟大庭之世
有巢無懷之先林居穴處鷗宿鷗眠惟聖作極民用始
全屋廬星周闌闐鱗駢然後宅中圖大矩方規圓鞏河
山百二以定鼎環畿甸九一以卜年總章闢而青陽啓
明堂敞而重室宣三十六戶豁乎鏜呀七十二牖剡乎
擘蜷熒兮嚮南離以重明巍然象北極而中天茲實皇

王之撫圖於是乎人極立焉茲三極者實皇極之所以
取則也爾獨不觀梓人之引繩而糾室也五材並蓄百
役兼并棖題棍栢楸栢梧桁條梁短椳檠戟飛甍壁礎
玉碣文璫金楹欒拱天矯而斗拱攢櫨錯落以星明惟
屋極居棟隆而獨重凜然昭君象而崢嶸是故易有太
極兩儀判而八卦生範有皇極九疇叙而五福凝人有
心極泰宇定而安宅寧居有屋極羣材附而大廈成極
之名義大矣哉匪皇皇我后曷以顯錫斯名方斯殿之

鼎新也定星炳耀日晷流明天帝下觀太一垂晶敕公
輸督墨而削繩詔離朱馳巧以騁晴工共總其矩度匠
石察其軌程黃道開而紫微朗豹尾潛而鶴禁清天時
極其良矣太行西來而列堵滄海東匯以環瀛黃河百
折承其前雷天壽萬仞障其後屏白虎蹲序而躩跣青
龍繞棟以拳擎地勢極其雄矣庶民子來百工趨爭輸
材颺候協力霆轟巨石騰巖而迅舉神木走陸以遐征
曾歲月之幾何允不日而落成人謀極其臧矣憲胥媿

以結構摹太階而縱橫雙闕凌雲恍蓬萊射日之銀榜
八柱擎天儼芙蓉接露之金莖規制極其弘矣左達文
華右通武英東壁則揭璇題於文昭西奎則標璘扁於
武成弘政顯其側棖宣治名其旁闕顧瞻皇極萃業業
以獨聳鞠巍巍其高瞻堊丹青而灼爍覓文石以光瑩
覆壓黃混拈摩葱菁中極團圞而上規圓蓋建極深奧
而內接乾清體統極其尊矣於是吾皇乘景運握昌符
膺寶曆撫瑤圖展皇猷而儼然臨御斯殿也琬璜旁注

冕旒前垂法乾坤以懸象章日月以陳儀被龍衮之綵
繪障雉翟之姜蕤凜顙若於黼宸時沈潛乎不愆運紫
樞而不宰拱玄默而無為象天極也行中采齊節應琳
瑯秉介珪以步武鳴佩玉而鏗鏘廓厚德以載物持鎮
靜以居方法地極也正身示範端軌率物肅闡闡以風
化基重邦畿而樹表式首肇修乎人紀覃敷敘乎天秩
立人極也無思無為惟默惟玄運動靜以闔闢斡樞紐
而轉旋凝精於冲漠之庭遊神於象帝之先涵太極也

靈臺炯炯丹府融融闢四門而洞達開八牕以玲瓏聳
空中之樓閣恍象外之玄宮凝心極也審工師之求木
採大匠之斲輪遴棟梁以負鼎任柱石而秉鈞獨總攬
乎洪綱爰出納乎絲綸隆棟極也承上天之陰騭恢皇
謨而作極敬用五事又用三德宣八政以勤民察庶徵
而省惕致審於雨暘寒燠尤重於師祀貨食所以法洪
範而敷皇極也至若玉漏聲達庭燎輝煌皎月光而入
戶聽雞鳴而未央聆車馬之璘璘勤宵旰而遑遑時未

朝而居中極也羣工方退萬機暫逸覽封章以延納進
嘉猷而採擇佇委蛇之餘閒受啓沃之茂益時退朝而
居建極也仰瞻朱扉俯視彤楹省三櫪之昭戒顧虛器
而持盈苟一木之內蠱將大廈而頽傾凜若累卵兢若
履冰覩丹銘而思保極也時臨青陽日拱紫宸因天時
以出治順月令而敷仁惠澤流於鰥寡懷保普於齊民
用斂時而錫極也遵道遵路是訓是式蕩蕩而無偏無
黨平平而無反無側民無淫朋人無比德庶民化而協

極也五侯九伯六服羣辟罔不會同咸來述職履玉墀
以趨蹌仰耿光而覲覲歡呼嵩嶽奠獻玉帛萬邦朝而
會極也南漸丹崖北垓紫漠東濱扶桑西底大磧雕題
窮髮之邦貫胷穿耳之國航海梯山纍象重譯稽首闕
下各執方物四夷來王而歸極也鳳凰巢於阿閣麒麟
遊於苑囿蓂莢產於階除萐莆生於庭堦卿雲爛漫以
繞殿甘露霏微而綴雷珍禾嘉穀列室而停貯野蠶八
繭當軒而疊奏和氣協於上下而治道底於極也嗟乎

古昔臨御之君物極則反勢極則傾滿極則洩畜極則
盈泰極者否形治極者亂萌歡樂極者悲來侈靡極者
盈生惟我皇之純德歷終始不渝而蕩乎難名丕繼二
祖之光祚克享累世之盈成其諸追天皇地皇泰皇而
相與游衍參乾極坤極人極而獨持權衡者歟薛曰惟
皇建極作京營室效彼蒼兮截薛嶮岨嵒嵒萃嶺岨以
昌兮霽靈竊寂靈霽歔鬱而揚兮龍翔蠖屈鵬掀鯢
喻翼其張兮宸居沕密穆清恭默儼垂裳兮軒祁風力

夔龍禹稷明且良兮都兪吁咈贊襄啓弼謨則臧兮鼎
固盤石浩劫罔斲祚乃光兮惟辟玉食斂福錫極壽彌
康兮會其有極歸其有極永無疆兮

雖肅殿賦

明 顧紹芳

於維我皇紹丕丕基至德房皇醲化陸離八方帖以安
瀾九重謐其清夷然且廣廈細旃毋替合宮之訪趨庭
問寢彌虔長樂之儀迨乎萬幾之暇登降逶迤俯仰祕
殿燕息自資既泮渙以少休乃穆然而深思曰昔姬文

之至德惟雖肅以自持越在宮與在廟肆臨保之靡時
余冲人之不淑願援古以為師於是肇錫新名煜煜墀
階朱榜爰以高驤金書炳而雙排肅肅雖雖厥義孔佳
采微言於周雅諒故人之我諧寂乎其端居湛乎其心
齋顧謚常存比書紳而逾切師保如在與銘牖乎奚乖
爾其祕殿之為制也挺丹禁以宅址模紫宮而作鏡重
軒虹騫以相屬層閣鳳舉而如競崇臺珍宇接構連甍
寶砌瓊牕霞流綺映遠而望之光凌太一之垣迫而就

之目眩蓬山之境是其儉不上陋奢不下病既秩且閒
亦深而覲豈比夫鄼侯之所經營奚斯之所嗟詠哉於
是我皇臨軒還軫鸞聲殷殷周覽厥象罪鬼干雲玉輅
戾止天顏有欣於以休憩乎是中屏息乎塵紛或籌幾
務或探典墳或棲神於澹泊或覃精於藝文漢主受釐
陋宣室之不度唐臣雜宴嗤集賢以奚聞蓋時當豐豫
而曰無已太康治屬綦隆而曰作所惟敬運太寶而無
為守中心以至正大廷廣會之時不以昭昭伸節宦官

宮妾之交不以冥冥惰行從容九五朝靡衡石之勤惕
厲夙宵人誦垂衣之聖此所以即宸居而渙大命者也
夫肅肅以敬雖雖以和蓄之而上德曼羨溢之而醇化
滂沱以是天覆羣黎徧天黃童之頌星羅萬國咸縻紫
塞之戈躋彼六合皆為化日靖茲勑解永不驚波但識
太平之有象疇知帝力以云何昔在姬文道隆化浹是
惟肅雖光有大業瞻寶殿之巍巍揭璇題之業業窺睿
思之所存恍文德之克協彼古今遙遙其千載迺心源

一旦而相接於都哉古則文王之文今惟天子之德寧
敬而過母和而極洵既詰而既明乃欽欽而翼翼比德
既與文而為兩卜歷斯過周而成億是其軼前代而高
翔俟來禊而作則者歟

御定歷代賦彙卷七十三

謹案卷七十二第十九頁後一行尊先軌以繼作
按唐文粹尊作遵

第二十一頁前一行星錯波泐刊本泐訛泐據唐
文粹改

第二十一頁前七行誇蓬壺之海樓按唐文粹誇
作蔑

第二十一頁後八行南七西九按唐文粹作西八
東九

第二十三頁後七行倚天開兮按唐文粹開作關
第二十六頁後二行乃居東而向陽刊本向訛曰
據文苑英華改

第二十六頁後三行務競競之孝理按文苑英華
競競作蒸蒸

卷七十三第十八頁後四行疎柱奔列按唐文粹
疎作竦又後五行黜日翳而罍連按唐文粹罍
作罍此並從文苑英華


第二十二頁前四行象胥僨譯按唐文粹僨作重
此從文苑英華

第二十三頁後四行告於神明按唐文粹明作宗
此從文苑英華

第二十九頁前七行天質之顥印兮刊本印訛昂
據詩經改

第三十六頁前二行不免乎儉固刊本儉訛險今
改

--	--	--	--	--	--	--	--



總校官庶吉士臣張能照
校對官編修臣莫瞻菴
謄錄監生臣錢敬熙

欽定四庫全書薈要

集部

御定歷代賦彙卷七十四

五

臣紀昀詳校

詳校官侯誦通政司經歷臣郭祚藏



欽定四庫全書薈要卷一萬七千二百九十三

集部

御定歷代賦彙卷七十四

宮殿

建章鳳闕賦

魏繁 欽

建章鳳闕賦

而繩直長楹森以駢停修桷揭以舒翼象玄圃之層樓
肖華蓋之麗天當蒸暑之暖赫步北楹而周旋鷦鷯振
而不及豈歸鴈之能翔抗神鳳以甄薨似虞廷之鏘鏘

櫨六駟以撫時侯高風之清涼華鐘金獸列在南庭嘉
樹翁夢奇鳥哀鳴臺榭臨池萬種千名周欄輦道屈繞
紆紫

象魏賦

以象懸國章道
崇政理為韻

唐 顏真卿

曰有唐之建都兮蓋法天而立象濬重門於北極聳雙
闕以南敞夾黃道而巖峙干青雲之直上豈一人之是
憑抑萬國之攸仰洎乎青陽戒節玉紀迴天萬戶閒漏
以傳響百僚執贄而獻年道人之木鐸既徇天子之金

章是懸觀乎渙發大號乎崇聖德澤如春流義若泉塞
公卿翼翼而仰化黎庶欣欣而無忒自皇明而播九重
由京師而降萬國美哉真盛代之聖明也爾其闕之為
用也叶古典布新章積非煙之疊疊幕佳氣之蒼蒼扣
峻墉以龍峙屹中天而鳳翔伯玉過而必肅子牟懷而
不忘若乃盤礴國門巍峩穹昊覆瑤草於輦路接青槐
於馳道亘玉斗而彌永半金城以處好既悅功於子來
抑有符於靈造及夫霜天肅霽曙景涵風對巖廊而隱

麟映玉樹以玲瓏既岌岌以業業亦穹穹而崇崇縱黃金與紫貝孰並美而傳功童子何知謬膺邦政徒欲竭其鄙思諒難酬於嘉命且賦頌之作本乎情性雖杼軸而屢空聊高歌以為詠辭曰巍巍雙闕兮岳立雲峙政令因斯以縣有兮黎元賴此以獲理敢頌美於一時庶流芳於千祀

象魏賦

以雙闕似雲浮為韻

唐黎逢

王者施令善人為邦法制惟明伊典章而有六象魏攸

設信高闕之以雙故其政坦蕩其教敦龐亦既懸之四方取則及乎瞻也羣心自降觀夫立如建標旁異懸鐻俯明庭之若砥夾馳道其如髮將欲朝百蠻之首帥集九命之簪笏豈徒競崑閬之瑤臺象河宮之貝闕高齊嵩華勢比恒碣聚北斗之瑞雲挂西山之落月令者政之端春者歲之始非適人之徇路陋秦伯之懸市取象則金榜為奢指字則銀鈎可似建中於下無或不美六官有成萬姓允理惟精惟一道深黃帝之書不削不刊

義合素王之史客有鄒魯之徒為之頌曰巖巖雙闕上
干青雲明於著令煥乎成文萬人承式九有來君彼駟
牧與露寢曾何足以稱云夫象者制法之流魏者大名
之尤合二美以成德懸千古而為儔四門穆馬少正之
誅何有大道行矣仲尼之歎焉求豈唯興禮讓息澆浮
而已哉

總章右个賦

以氣變銅渾灰
移玉管為韻

唐蕭昕

大君嚮明神道設位恢三皇之軌物張五帝之經緯居

皇極以體尊配昇平而作謚上棟下宇圖出震之垂功
崑崙辟雍模大壯之成器分五行以配德合四時而導
氣審圓象以規天揆方儀而法地因節候之開闢得四
時之奧祕不然何以審寶位之尊彰后王之貴者也夫
其體物辨方因宜制變壯雲構之直聳屬星躔而右轉
玉露朝落金風夕扇收帝藉於西成誓武人於南面然
後緝以衆政休茲百工草黃月季虛正昏中釋菜吹豳
命樂人而萬舞斬牲示戮習軍威於五戎既依方以服

玉遂候呂以吹銅徒觀其在陽體尊規模所存取闕寒暑以法乾坤環沔彼之流水設有閤之高門布政居方順時開闔乞言講德肆志討論宣八風而配律齊七政以同渾爾其大禮盡設明堂洞開興亡之跡厥德不回見周公之負宸看紂王之罹災設殷監於既往垂大軌於將來邃宇九房採唐堯之茅屋神階十二懲夏癸之瑤臺故當勤求庶政想望英才不爾何勞謙於昃日而旋斡於飛灰既而四方述職九品陳儀禮有攸叙政無

不施發聲明於風動趨劒履而星移道敷鷄鷺兆合熊
羆永恭已而南面故垂拱而無為非斯宇以攸贊亦何
取於成規是月也天子禮神祇展牲玉感物增思虔心
以勗既嘗稻以薦大亦趨刑而斷獄明大閱以講威訓
羣騶而撫俗別有粉署承風金門獻款念無媒以贈策
謬談天於窺管

花萼樓賦

以花萼樓賦一首并序為韻

唐高蓋

開元中歲天子築宮於長安東郭有以眷夫代邸之義

舊者中宮起樓臨瞰於外乃以花萼相輝為名蓋所以
敦友悌之義也銀榜天題金扉御闕俯盡一國旁分萬
里崇崇乎實帝城之壯觀也是時海內賓薦之士咸遊
仙署馳神累日以待問於有司有司盛稱茲樓並命賦
之小子庸蔽敢同頌美辭曰

惟唐六代盛德被於幽遐彌玄都暨丹穴掩扶海與流
沙莫不推福祚之攸永極威靈之所加敦本既同夫義
軒之日睦親又比乎棠棣之花裂土苴茅以表慶錫珪

分瑞以聯華信可以受無窮之祉而保乂我皇家者哉
迺命有司濬池隍繕城郭將崇大壯之義載考方中之
作繚垣牆周乎舊宮設井榦而為新閣既準既繩以揆
以度望馳道而通禁林走建章而抵長樂攢畫拱以交
映列綺牕以相薄金鋪搖吹以玲瓏珠綴含煙而錯落
飾以粉繪塗之丹雘飛梁迴繞於虹光藻井倒垂乎蓮
萼信神明之保護亦列仙之憑託於是乘輿乃登夫翠
輦而建華旒鉤陳警道兮環衛周命期門使按蹕將有

事乎娛遊六龍驤首以啓路八駿騰光而夾輶且肅肅
以穆穆幸夫花萼之樓然後層軒四敞聖情周顧遙窺
函谷之雲近識昆池之樹綠野物霽分渭北之川原青
門洞開覽山東之貢賦亦以崇友悌之德勸農桑之務
豈止唯臨鄠杜之郊空指邯鄲之路而已哉且壯麗難
匹光華匪一馮禁掖以孤明隱垂楊而半出赫昫昫以
弘敞肅隱隱而靜謐非匠氏之奇工梓人之妙術孰能
至於是哉歲如何其歲之首花萼樓兮對仙酒願比華

封兮祝我聖君千萬壽歲如何其歲始正花萼樓兮開
御營願同吉甫兮頌我聖君億載聲蓋聖人去有欲反
無名深宮皓素高居穆清觀羣材之樂業朝諸侯而嚮
明即知華夷欣慶冠帶混并均五氣之善叶三光之精
嗟乎時難再得歲不我與跡已混於沉滯心未齊於出
處此小子之所以瞻梁棟以自非仰雲霄而失序

花萼樓賦

以花萼樓賦一首并序為韻

唐王諲

我唐有國塹炎海而苑絕漠封日域而隄流沙生堯舜

而開統誕文景而承家於茲百有二十載開元皇帝御
極居藩符五馬之兆在天豈一龍能加愛弟則淮南之
仙術名王則臨淄之才華朝有土階之約宮靡瑤臺之
奢飾舊館而納景建飛觀而臨霞長公子之自薄塞主
人之相誇非徒擬花萼之麗蓋取諸棠棣之華請循其
始仍舊而作珍林自生靈池不鑿下池塘之煙霧植掖
垣之花萼鳬鷺翕習而來止樓臺巉巖而相錯雨日而
雲起澄潭霽夕而月懸高閣歸梁國於上苑通代邸於

平樂洞複道而為臨幸轟曾城而作垠堦於是于城之
陬建此飛樓橫灑迤而十丈上峻嶒而三休仰接天漢
俯瞰皇州百鄺之所迴合九達之所夷猶總萬象之多
少極二曜之環周為棟宇之殊觀實崇高之寡仇蓋術
者之不陋亦帝王之所遊規模制度去奢維素方面曲
折匠石所務浮欄鬱律而却偃飛甍參差而前注連磴
道而內屬曳軒牕之橫驚龍獸撫柱而相驚虹蜺亘薄
而齊布塗椒蘭以為馥銜明月而為炷榜題伸將之手

頌登文考之賦六合清朗天地靜謐明主垂裳賢臣屈
膝龍輿親覽珠旗曉出言羽衛以清帳勅太史之擇日
點翠幕而夾道列雲影而竟術萬國爭馳而駢會千官
畢扈而成秩宮闕迢遙其若浮郡國森羅以如一廣宴
頒大官之膳鴻需寬司寇之律獻春之望嚴更羅守月
上南山燈連北斗魚啓鑰於樓上龍銜燭於帳口帝城
縱觀而駕肩王宮望瞻而仰首鼓吹更落琴笙夜久清
歌齊升而切漢妙舞連軒而垂手張廣樂以建和示至

樂於羣有天子偃伯天下高臨穆清理國以道與代作
程不純儉以愆德不徇奢而害盈建宮而豐其屋則遵
求舊作室而節其用則示間情其孝友也署為花萼之
號其勤人也則榜以政本之名何聖人之啓意物與道
而相并秦作阿房而窮侈靡漢宮未央以自尊榮由是
展禮樂開塾序太學時薦列國奉舉擇仙郎為清選之
官闢星臺為明試之所顧無智士之知難而勞能者之
虛佇

花萼樓賦

以花萼樓賦一
首并序為韻

唐
張甫

粵若帝業盛惟皇家宅秦都雍枕梁通巴開別館以對
赫飾離宮而再華叙溫恭之深愛沐棠棣之榮花當其
代邸初構華池方鑿鴻鴈新來潛龍未躍磐石利建維
城固作授車東華之門飛蓋西園之樂升降五位周環
四託維梓維匠爰謀爰度建綵樓規層閣欒櫨跂翼以
攢鬬枝掌杈枒而相搏凌兢雲垂業爰星錯風恬氣隱
雨霽煙廓中坐平望數香街之往來馮檻下觀盡天京

之郊郭厲丹鳳陵白鶴浮網玲瓏流光灼爍陰移翠伏
影碧潭之清冷日上金題照錦林之花萼帝曰惟休順
豫而遊躋攀初極眺覽還周登萬樂或歌或舞列千品
乃公乃侯莫不傾赤縣竭神州士女都集衣冠盡留悉
觀聖旨共仰皇猷掩宮扉則聞簫聲之下漢卷珠箔則
覩天人之在樓至若乃趣是求立喻政有光於聽覽事
無妨於農賦邈以迴出花容玉質綺樹紛映類仙臺之
下空天光照臨若秦樓之上日列衆牕以啓扉疏重門

而夾室紅塵晝斂則數之疑千綠雲暮屯則望之如一
理孝光大敦敬則友撫安戎狄調六合以為家敦睦友
于冠百王而為首化猷方行土無不并演湯禹之仁惠
灑唐虞之頌聲士庶從而言曰觀其壯則知至尊之攸
處察其功則知萬人之是與欽其號則知昆弟之相穆
見其儀則知君臣之有序此聖情方在於玄邈豈小人
之賦能舉

花萼樓賦

以花萼樓賦一
首并序為韻

唐
陶 舉

粵若稽古大哉皇家叶聰明於六聖敦孝友於四遐睦
親親以相及樂韓韓以同華漢后龍宮建邸園之水樹
梁王鴈沼通禁掖之煙花仍峻隅以立制葺重樓之可
嘉嘉其謂何感物而作取諸棠棣目以花萼既揆日而
爰謀亦占星而是度奢必去泰儉而匪薄素壁照曜以
霜暘丹桂翕葩而霞錯疊欒櫺之天矯繞軒檻之周流
雖麗萼之不足實規模而寡仇秦皇祈年之觀漢武井
榦之樓在縱驕而彼得豈興奇而我儔若乃百寮望幸

一流煦君御下而觀風臣登高而獻賦信布澤而昭
德豈徒樂而是務術徑直千廊閉如一察近遠而皆盡
指纖微而匪失前卷珠簾後却疎牖分渭北之川光別
終南之峰首千門迴霽百陌微明翠幄凝煙暖青軒以
靄映紅荷浸水嬌綠浦以縈盈咨謀景暇遊務晨并爰
居爰處載笑載語萬人是察九族惟叙猶側聽於輿言
或敢揚於君舉

花萼樓賦

以花萼樓賦一
首并序為韻

唐敬括

大哉神武四三皇而作主赫矣勳華一六合而為家莫
不北荒於窮髮西極於流沙故得殊方效祥則黃銀紫
玉禁苑呈瑞則芝草仙花彼成康與文景又安足以道
邪美夫一人有作庶品咸若以為不壯不麗無以彰至
尊是用上棟下宇將以信景祿於是建百堵之崇墉起
九重之層閣上鬱律兮中窈窕靈煌煌兮神漠漠形直
舉而孤標勢將飛而不却俯蘭叢之長坂對旗亭之延
郭鑾輿屢降豈寫望於桂巖金榜遡開遂興名於花萼

懿哉鴻紛以光寵夫何佳氣之蕭索洎夫冰開御溝春
滿皇州青氣始霽旭日初浮皇帝乃被法服登茲樓羅
綵仗駐鳴騶開繡戶之銀鎖卷朱簾之玉鈎冠蓋穆然
而仰敬睟容端拱而倚旒將欲居北辰而觀萬國嚮南
面而朝諸侯豈徒爰居爰處以遨以遊而已哉邈邈凌
雲崇崇作固虹梁蚺蜺而霞艷皓壁晶晃而月素亘以
遐路近對東郭之門周以繚垣遙接上林之樹流雲衝
牖而中斷飛鳥拂簷而斜度賁育之捷猶矐眊而不能

躋揚馬之才斯侍從而為之賦若乃雷雨作解乾坤得
一澤布三春歡逢五日陳簪笏之濟濟耀威儀之秩秩
皇帝乃臻夫此樓也若其旁倚鳳城却瞻龍首帝幕黔
以分布車徒紛以相輜奉常陳百戲之樂大官進千鍾
之酒巍巍天子南面山壽德洽蒼生樂乎大有別有失
路營營棲遲此情時哉未遇命也難并參歲賦兮徒延
佇懷明君兮變芳序思入仕以盡忠悵良時而誰與儻
仙郎之高鑒冀夫鵷鷺而為侶

廣達樓賦

以珠簾無
隔露為韻

唐李濯

聖人定天保據皇圖法乾坤之正位當河洛而建都闕
宸居於斗極立象魏於天衢明堂掇雲可以恭祖考之
配土圭測景可以驗盈縮之符蓋將以同光日月比德
唐虞以為損之又損不可取則觀象不壯不麗安可威
戎耀胡乃歲匠石命班輸審曲之官必萃明中之士載
驅建崇樓於闕下聳飛閣於城隅諒惟新以樸斲蓋仍
舊之規模因子來而悅使豈殫力以為娛材露桐柏階

駢砮砮應龍蜿蟺以驤宇猛獸鬣肩以乘桴明璫藻耀
於懸井朱鳥騫翻於薄檻璇題景曜銀榜霞鋪及麗譙
而崛起疊井榦以相扶月透穰壁星懸網珠莫不功侔
造化妙盡洪纖雉堞相望而閭連宮闕門闌廣達而俯
接閭閻德陽傍倚少室前瞻散春光於玉戶擁佳氣於
珠簾桂棟連雲巢儀彩鳳鶯枝擢秀影伴初蟾若乃皇
興戾止羽衛龍趨召西園之花萼奏北里之笙竽湛堯
樽而百辟和暢皦舜樂而四海歡愉窮歡浹日宴樂成

需下金屋之仙伎出瓊樓之豔姝飛曼唱則衆類斯洽
激清聲則煩憂自無皇情穆然聖慮夕惕數路必達四
門廣闢撤懸損膳捐金抵璧懼侈心之有萌恐澆俗之
未革乃延直史引詞客正八音稽六籍以為深居內視
不足以觀政化是用發號施令將欲以省力役慮一物
之乖所念九重而斯隔故坐衢室以觀謗登總章而側
席乃命道人以勸農宣木鐸以徇路求大隗之至道示
赫胥之太素樂俗安居者皤皤而鼓腹啜菽飲水者熙

熙而含哺撫薰風歌湛露開罪洛陽之獄望氣大庭之
庫象乎帝先廓我鼎祚巍巍乎應天地之變通蕩蕩乎
作皇王之軌度

吹笛樓賦

以時平故事有
吹笛樓為韻

唐鄭 瀆

路出東門當川原靜處以凝望見櫺檻蕭然而起愁問
於垂白荷鉏叟云是明皇吹笛樓龍吟洛水兮韻如在
鳳去喬山兮君不留當昔開元之時天下無事鴻恩不
間於中土鑾駕常遊於北地姚公宋公之智略動必諮

謀寧王薛王之忠貞出皆參侍西則秦京東則洛城八
百里之歌鐘斷續五十年之寰海升平於時駐清蹕御
丹楹執簫管而宸衷時悅臨曲欄而睿思俄生莫不湘
絃罷彈泗磬休擊楚舞態止齊謳韻寂九天斂霧送芳
景於瓊軒萬籟韜音讓嘉名於玉笛既運指而有規乃
濡脣而是吹林巒兮髣髴如變寒暑兮須臾可移折楊
柳之數聲鴈驚前渚落梅花之一曲鳥散芳枝自從弓
劍有遺星霜頻度綺牕蕭索以將毀繡嶺連延而若故

竟無六律繼當時紫府之清音空有一條是往日翠華
之來路雕檐寂寞兮鏤檻堪依隙駟寧迴兮煙鷺莫追
三山迢遞在何處萬姓淒涼無見時宮商之杳眇難尋
雲消雨散榱桷之傾欹若此月慘風悲苟非德邁三皇
化數九有龍馭雖逝鴻名不朽則斯樓也寂寔空存安
得往來霑襟而稽首

五鳳樓賦

宋 梁周翰

伊京師之權輿也遐哉邈乎驗河圖之象按輿地之書

宅禹貢豫州之域距天文辰馬之墟因四履建侯之地
為六代興王之居城浚而都派河而渠結坤之絡振乾
之樞星躔櫛堵我民之廬海漕山膾我田之租勢雄跨
胡氣王吞吳茫茫萬國魚貫而趨惟聖皇之受命應期
運而握符光潛躍於龍德踐元亨於帝衢道德何師尊
盧赫胥揖讓何比陶唐有虞英略神武威憚八區封豕
必誅長鯨盡剝虎皮包刃鵠板搜儒墜典皆索闕政咸
鋪成天下之大務若雷奮而風驅乃顧京室時行聖謨

陋宸極之非制稽紫垣之舊圖且曰不壯不麗豈傳萬
世禹之卑宮蓋勿暇之計堯之茅茨非經久之制矧象
魏之懸法伊億兆之所視况我力如天我貲如地不漁
爾民不牟爾利一毫之費差足為易乃詔共工度景之
中因舊謀新庀徒倂功臺卑者豐棟易而隆椽斲而礲
去地百丈在天半空五鳳翹翼若鵬運風雙龍蟠首若
鰲載宮丹楯霞繞神光何融朱楹虹植晴文始烘繡楣
焜耀彫拱玲瓏椒壁塗赭綺牕暈紅雙闕偶立突然如

峰平見千里深映九重奔星墜而交觸靈景互而相逢
門呀洞缺若天之裂縱舉百武橫駕六轍金鋪爍人光
景明滅舞陽之力莫得而排叔梁之力胡可以挾其下
則冠蓋歲蕤劒佩陸離車如流水待漏而馳駕肩排踵
兼蠻混夷萬衆紛錯魚龍尊卑咸去來之由此競奔湊
於玉墀亶皇風之無外豈朝盈之有時三事庶尹乃拜
表蕭牆謁帝未央以落大壯登歌永昌曰元聖明兮帝
道昌威四海兮君萬方峙高闕兮冠百常赫宋德兮垂

無疆瞻天顏兮獻壽觴願君王兮長樂康帝曰俞哉爾
觴且置當聽朕言庶曉朕意頃於戎馬之暇詳窺歷代
之紀乃知乎夏德之衰璇室自庇商政之壞瓊宮大修
楚王章華一身何寄秦皇阿房三世而棄漢武柏梁擊
火隨熾陳后三閣義師尋至豈非乎禍生於漸欲起於
恣亦如崇飲不已必至昏醉嗜色不已必至乏瘁遷怒
不已必絕人祀窮兵不已必暴人嗇甘諛不已必杜忠
義溺讒不已必斥賢智亡國之君未嘗不爾朕皆知之

得以趨避淫於土木雅不如是美其成功良以為媿不
舉君觴恐驕朕志其大者天地所重者神器尾虎足冰
終日惴惴當共重之勿使顛墜謹謝公卿無忘納誨羣
臣乃退咸呼萬歲

南都鐘鼓樓賦

明王渙

晚出虎胄步越雞鳴登西岡而迤邐駭雙臺之崢嶸翹
然左而居震江鼉遙應乎革響傑然右而當允蒲牢四
撼乎金聲天垂象而日月並列陽裂陰而雷霆交轟類

文王之靈臺實闢姬運陋漢家之鼎室克壯我明粵自
高皇定鼎金陵文修武偃亂息治興銷天下之兵以為
國不復用卷天下之革以示師不復膺向之蛇矛虎鉞
誅齊戮楚者今命之鐘而聽至和之洋洋昔之犀皮兕
鞞驅亡逐叛者今命之鼓而成歡呼之鑿鑿百治火鎔
齊宣一牛之孰釁千釘星布方叔萬槌之足勝鋒鋒乎
虎嘯風肅鏃鏃乎龍吟雲騰誠擬大禹之階設而諫言
由入固非明皇之自擊而禍亂相仍氣壓六朝震驚三

國嗟彼不振昭我音德玉樹歌華孰比天地之樂和銅
雀貯伎寧知鍾鼎之垂鉞神姦自絕二豎不惑桐戩三
千長江濤卷筵扣百八寰海氛息想夫斯聲之入於王
宮也嚴一人之宵衣促六宮之侍輦官豎褰簾而灑埽
禁兵歷階而旗閃斯聲之散於都城也文而百司之整
珮武而千屯之東甲商賈以之趁墟趨廛農工以之懷
斤荷鍤聲聞於南與則吳楚賓聞於北與則燕趙服華
夏聞而萬派自爾東朝蠻貊聞而羣馬不敢南牧茲皆

顧瞻而想象得心而應目者也惟我辟雍與樓鼎峙音
達乎規矩準繩之號舍義激夫孝弟忠信之吉士予方
晚覩層樓訝雙蛟之騰天夜夢鐘鼓作二龍之並倚一
腰百圍而髯赤一口千石而鱗紫蟠帝城而環拱廟社
拖鍾山而吸卷江水嗟不鳴之若聳俟霹靂而飛起

集靈臺賦

以聖君弘道景
福會昌為韻

唐
張良器

希夷乎人皇居明堂闢陰開陽冠通天兮蔭華蓋發大
號兮流耿光將樂瑤池之宴集由喜玉京於壽昌降清

問於宣室討真經於柏梁乃因高為臺順時謀築披翳
會翦林麓鏟重岡移峻谷量其遠近以議夫土功命彼
般倬再度乎山木使人以悅無告於勞均力取材不遠
而復屹九重以初起馮一簣而始覆其為勢也峨峨皚
皚粉壁光兮朱門開若方丈與蓬萊其為麗也崢嶸郁
煜星柱浮兮雲楣肅狀靈光與景福有時鳴猿告曉貞
松斂靄千峰轉日迎秀色於瓊樓萬歲傳聲和幽音於
地籟磅礴壓乎人境抱劣聳乎天外王喬飛舄見鳬影

之翩翩神女窺牕聽鸞歌之噦噦俯衆山兮如束縈八
川兮如帶上方向晦宴息齋心防戒乘金根回玉軼夸
父秉鉞蚩尤揚旆鐵衣沸渭以焜煌寶馬騰驤而沛艾
環鉤陳而烈武士震碑訇兮軼埃壒登夫集靈之臺謂
天帝而為會奏無聲之樂寂寞而難分展無體之禮質
素而無文晬容綽約元化氤氲聖主湛恩散作八方之
雨清都喜氣凝為五色之雲彼昇龍鑄鼎之後捧盤承
露之君徒髣髴象於前載孰能成乎此勳然大造之德曰

生大君之位曰寶未有離於兆庶而復謂之至道願獻
華封之壽上祝唐堯之盛股肱為良元首作聖用壯辟
雍之美乃經靈臺之政豈必沐咸池陵倒景脫屣乎寓
縣棲真乎絕嶺居中天之峻極從化人兮習靜然後居
無何之鄉去有為之境者也於是情冥其慾德貴惟恒
可大可久不騫不崩動植風靡雍熙日弘宜其四溟式
晏而人和年豐

通天臺賦

以洪臺獨存浮
景在下為韻

唐

闕名

行人徘徊登秦原而遊目見漢右之荒臺清風穆其尚在翠華歸而不迴對古情至臨高思來披蔓草以遐想覩離宮而興哀試問薪者乃秦人也云漢之興茲臺之下馳道通乎中禁周牆繞於平野經逝川而不息撫環堵而殊寡昔漢皇帝幸甘泉宮肆目將遠築臺其中高居物外若與天通祈列仙之戾止致壽聖之延洪繹繹憑雲蹲蹲捧日干元氣以直上倚長空而迴出危檻岩堯迴途鬱律植承露之盤開肅神之室將以接上元朝

太一乘大君之登降訪總真之撫實於戲郊祀之義志
而可採鴻紛之狀望而已改哀壯麗之都失想威靈其
如在徒野鳥之飛來何真人之可待且白日可以精貫
玄珠難乎力求雖層臺巖嶇磴道周流秦時乎西面齊
宮乎上頭仰通蒼昊俯瞰皇州寧不死之可致諒其生
也若浮我國家立太平尚清靜儼宸居以自整絕仙臺
之望幸雖丹檻栖於列宿飛梁歷於倒景有唐虞之允
恭無漢武之遊騁化由其衷居慎其獨有儀可象無思

不服自然為域中之大獲天下之福等南山之不騫何
高臺之是築

一 通天臺賦

以洪臺獨存浮
景在下為韻

唐 任公叔

武皇起雲陽之宮致崇臺於爽塏就山谷之交會得神
明之所在近瞰八極周臨四海將端冕而不二必垂衣
而有待是用迴載天路高標地游依稀玄圃想像丹丘
磴道邈以特立通天赫其無儔託神靈於秦甸結元氣
於雍丘白日旁轉青雲上浮八垓可接於咫尺步萬象無

逃於寸眸是獻歲春衆靈咸秩天子乃舉羣祠撰吉日

郊上玄禮太一風伯陪乘蚩尤扈蹕向甘泉以整像屆

通天而挺出既而越氛霧之塗近星辰之境背麟行之

五時面長安之萬井岐陽太華雙標象魏之形秦嶺終

南遙樹軒墀之屏蹈煙霞而有慕潔齊戒而思青奉寶

位之虔恭佇神仙於光景當其宵衣待曙暘谷未開鈎

陳匝乎營衛天漢列以昭回燿火周起神光迴來暨三

山之遍登當仰候於斯臺靄靄高躅神祇熒熒喜氣周

旋慶雲迴復召安期於滄海降王母於黃屋樹翠玉以
青葱草靈芝以芬馥上結綵幟高居耳目斯覽物以懷
柔非取樂於幽獨觀乎層構陵空形勢作雄風起而纖
埃不致雨過而瀑溜潛通其載惟厚其覆惟洪所以大
啓於皇祚豈徒峻極於蒼穹是以擁帶休徵感通純嘏
會歌童之曲節彰從臣之風雅立極人望叶靈王者將
大漢之可追願侍祠於臺下

通天臺賦

以洪臺獨存浮
景在下為韻

唐

楊系

伊昔炎漢功高化洪樂率土之暨阜築通天而且崇初
一簣以發地終百尋以隱空構之以榱桷飾之以丹紅
浮彩外爍流光內融赫兮烜兮獨出煙雲之表壯矣麗
矣迴標天地之中柏梁不同井幹非匹勢岌嶷以山峙
體瞳矐而景軼中邃窅窅入之者當晝而居昏上跂峻
嶒登之者先曙而觀日偃佺於是乎宴處安期於是乎
暇逸月上壁而旁飛雲緣梯而下出粲粲彩彩靈仙兮
所在若瑤臺之雲馭冠鼇山於溟海炳炳彪彪天子兮

共遊若瓊樓之霞蔚照龍燭於崑丘光玉樹而葱翠影
甘泉以沈浮於是孝武皇帝紹祚卹脣登眺遠騁高揖
八極俯窺萬井拂軒楯之宛虹步檐楹之倒影乃言曰
可以臨萬國可以遊九垓凡厥層構莫先斯臺窺地底
以豁險阻天門以崔嵬謂四夷不遐將拓跡以開統見
百神咸在則祈禱而禳災既玉女之下視復金鳥之上
迴既而襄雲獻賦文質彬郁且曰陛下承天啓聖聿膺
多福排玉戶於玉堂颺金鋪於金屋亦可以上憂宗社

下恤惇獨何峻極於臺榭恣歡娛於耳目將乘奔而獨
懼矧長途而中宿至矣哉斯言也我皇德循楷式帝錫
純嘏儻茅茨而是陋堯何事乎光宅天下

觀風臺賦

以曾構重屋以
觀八風為韻

唐 闕 名

我天子德廣虞夏業傳高曾展義之心攸克觀風之禮
必登故臺之用也斯建臺之名也是弘然後度材比德
奢而不盈興功俾役儉而不陋萬物是集百工是湊從
繩罔愆運斤以闢歛以山立揭焉雲構豈不謂鴻休叶

贊玄德時雍錯綜之典不革經始之道克從闢以九戶
簷以千重接祥光於溫液納瑞氣於驪峰觀乎大廈耽
眈飛簷穆穆殊形詭制羣品異族或霞駁而電開或龍
蟠而獸伏浩飾彰盛洞文潛蓄既藻井以垂珠亦丹墀
而布玉晴天反照垂蟠竦於雕梁霽色澄明挂蟾光於
重屋混合玄麗巍我特起入窈窕兮不知其所之視瓊
謁兮不知其所以及夫西成罷務北陸將寒霜封原隰
雲蔽峰巒金輿斯御綵仗初攢寧侈心以攸往必風俗

之所觀設教陳詩事必彰於禮備承天統物政本在於
人安至如庭宴薰薰衣冠察察其樂將萬其儀用八奏
金石兮匪疾匪徐命鼓琴兮載擊載戛既而若登仙景
若奪神功度宏觀兮其外動變態乎其中傍眺六合遠
視八風吐元和而納純懿詠仁洽而歌道豐則魏之所
造漢之所崇伊制作而靡及豈古今而遽同客有觀乎
順動審彼始終因厥誠兮受慶宜永永兮無窮

測景臺賦

唐
范 榮

大聖崇業萬象潛通據河洛之要創造化之功建以黃
壤亘以紫宮右輔伊闕左連轅嵩銀臺比而可擬瀛壺
方而詎同掩扶桑於日域包蓬萊於海濛式均霜露之
氣以分天地之中於是仰玄穹之文俯黃壤之理下壓
坤德上羅乾緯垂形象物既不假於銀衡司刻探玄何
必邀於銅史其細也難究其妙也若此斯豈光陰而若
易徙且夫聖不可測道實兼致天地與能幽靈必契囊
括衆巧網羅羣藝自然而來疇能比計今來古往時移

道替滋歲月以成朽覺風塵之漸異人有代兮俗沒地
有形兮無制零落空階莓苔古砌頽墉邈迤但覺蕭條
高阜荒涼寒城蕪翳攀聖迹而難企感吾徒而流涕猗
歟成周系聖纂極君少臣政流言更逼自陝卜洛其儀
不忒公敷其化人盡其力惠而不費功成事息欽聖德
之微臭豈賦者之能識

測景臺賦

以設在天下中端
景垂則為韻

唐
闕名

瞻彼古臺揆日爰設載徵經始之旨將測運行之節天

地之心可見風雨之交既別玉律匪先土圭是揭以徵
陰陽之短長以察浮驟之晷轍不然者焉可以酌其數
於高空建天中而有截詳厥周典詢諸日官以寒暑為
候以陰陽為端且俯接神州迴當嵩嶺憑累土之增構
運孤標之直影矧因高以垂範異尋虛而捕景分至有
度知王者之迎長盈縮不憊念志士之思永巖巖霄聳
昭明有融九層一驗萬寓攸同彰宣精而示下表無私
而得中況復圭植於臺日生於海當呈象以委照必澄

霞而賦彩兩童之辯猶惑太史之占斯在上千里而是
馳下寸晷而未改嗟夫悠也久也玄之又玄昇大明而
赫矣顧崇址而歸然是以分北陸識南躔審以作程定
此而會期率土中以舉正因茲而仰辨均天唯彼玄德
我后是則普觀端景知立表於天中潛測末光思勞躬
於日昃至若視朔興紀書雲立規浮箭司辰且於室內
建木滅影或在天垂豈比夫茲臺之特立平四氣而止
兩儀

烏臺賦

唐 闕名

士有利於鴻漸者觀乎憲臺降太液邇蓬萊風威四警
霜氣傍催地疏曹而獨秀居對禁而分開提綱必理舉
職惟才門凌晨而豸出樹夕陽而烏來旌良表正瘴惡
繩回乍以飛騫淒其疑矣時為搏擊吁可畏哉嚴城岑
寂靈臺巉巖直狀臨而逾明偽迹投而遽剋故座有彝
法門無濫板理從擾而庭幽事雖繁而人簡及夫貪吏
無厭豪宗不戒酷奮黔俗洪威桎械致中典之淪否令

下人之彫瘵百城相師而自若五兵乂安而不怪是司
也故以務遠聲哇長喟奉絲綸以遐察騰錦車而遙屈
則跋扈顏沮強梁志憊望驄馬而跼蹐仰繡衣而下拜
是知上能贊聖下足安凡顧盼而朝班已肅推彈而邦
度增嚴庶究厥能請循其始官則秦置臺從漢起或掌
方書或稱柱史朱何以忠雅標懿柏陳以剛直著美上
封則起於鄭均理輪則遠聞張紀虞詡之人方側目暴
勝之名兼直指皆玉秀珠明鷹隼視既幹時而助化

亦圖國而遠恥莫不才挾主以成功主因才而共理唐
纘玉葉蓋臣惟哲法省羸劉臺兼員薛昂涼階宇奮迅
霜雪耿獨坐而情雄邈羣司而位絕稠人廣衆望影而
魂褫暴黨姦雄覩形而膽折豈徒以聳動寮案逡巡朝
列儻吾道之將行庶從茲而振節

平樂觀賦

漢
李 尤

乃設平樂之顯觀章祕瑋之奇珍習禁武以講捷厭不
羈之遐鄰徒觀平樂之制鬱崔嵬以離婁赫巖巖其崑

嶺紛電影以盤紆彌平原之博敞處金商之維陬大廈
累而鱗次承岩堯之翠樓過洞房之轉闥歷金環之華
鋪南切洛濱北陵倉山龜池決萍果林榛榛天馬沛艾
鬣尾布分爾乃大和隆平萬國肅清殊方重譯絕域造
庭四表交會抱珍遠并雜還歸誼集於春正翫屈奇之
神怪顯逸才之捷武百僚於時各命所主方曲既設祕
戲連叙逍遙俯仰節以鞀鼓戲車高橦馳騁百馬連翩
九仞離合上下或以馳騁覆車顛倒烏獲扛鼎千鈞若

羽吞刀吐火燕濯鳥跼陵高履索踊躍旋舞飛丸跳劍
沸渭回擾色渝隈一踰肩相受有仙駕雀其形蚺虬騎
驢馳射孤兔驚走侏儒巨人戲謔為耦禽鹿六駁白象
朱首魚龍曼延崐崘山阜龜螭蟾蜍挈琴鼓缶

東觀賦

漢李尤

敷華實於雍堂集幹質於東觀東觀之藝孳孳洋洋上
承重閣下屬周廊步西蕃以徙倚好綠樹之成行歷東
屋之敞坐庇蔽芾之甘棠前望雲臺後匝德陽道無隱

而不顯書無闕而不陳覽三代而采宜包郁郁之周文

直坊賦

有序

梁蕭子範

余以天監六年為洗馬十七年復直中舍之坊感恩懷
舊悽然而作

歲惟奄茂清明送風承恩從官自府遊宮信吾生之多
幸遭六合之大同何坊禁之寥閔對長庭之蕪永門幽
幽而重閉室愔愔而內靜應曉刻而坐朝聽鳴鐘而自
警雖生風於蟪蛄終罕曜於陽景頗留連於九思恒慙

勤於三省於時也春果餘英夏條垂實殿穹隆而起陰
槐連拳而負日傍高墉之邈迤觀層扉之鬱律寫學宮
於洛都模畫堂於漢室臺榭千名仙靈間出

御定歷代賦彙卷七十四